

He Whakatau

Me mātua pānui kia mārama rawa koe ki ngā whārangi 8–14 o tēnei pukapuka.

He whakarāpopoto

Pānuihia te whakarāpopoto ki te ākonga. E kōrero ana ētahi hua whenua mō ē rātou ake painga, reka hoki. E kōrero whakahihī ana rātou ko wai te tino hua whenua. Ka kitea!

He kupu whakataki

Kia kaha ki te whakamahi i ngā wheako, me ngā mōhio o ngā ākonga. Kia hāngai tonu te whakatenatena ki te whakauru i ngā ākonga katoa. Me whakatitina rawa te pūkenga tiro whakamua. Matapakihia ngā kupu hou, me mahi rawa te papa kupu me ngā whakaahua kei te uhi. Me whakamaumahara hoki te ākonga kia pātai ki a ia anō, i te wā e pānui ana ia mai i te tīmatanga ki te mutunga o te pānui.

Mēnā ka āhei ngā hua whenua ki te kōrero, ka pākiwaha pea rātou mō te aha?

He aha ngā tino hua whenua a te ākonga? He aha ai? Tūturu, ka pai ake tētahi momo hua whenua i ērā atu momo katoa?

Matapakia te whakatauāki, “E kore te kūmara e kōrero mō tōna māngaro”.

He Matapaki

Tirohia te pai o te pānui a te ākonga

I te wā o te matapaki me pānui te ākonga i te katoa, i tētahi wāhanga noa iho rānei, o te pukapuka ki a koe. Kātahi ka:

- whakanui, āta tatari, whakahau tika;
- titiro mēnā e tika ana, e pai ana hoki (mā te tatau i ngā hē), te rere o te reo;
- titiro mēnā e mārama ana mā te whai i tētahi o ngā huarahi e whai ake nei;
 - te pātai i ngā whakapuaki māramatanga me ētahi e tika ana, ā, whakaritea kia kōrero anō te ākonga i tētahi wāhanga o te pakiwaitara ki āna kupu ake;
 - te pātai mō tētahi āhuatanga o te pakiwaitara, arā, te kaupapa, te ritenga, ngā ariā matua, te raupapatanga, ngā kiripuaki;
 - te whakatenatena i te ākonga mō tana tiro ki mua i whakaputa ai ia i te wā o te whakataki.

Whakaarohia he aha atu hei mahi mā te ākonga

Me whakahau te ākonga:

- ki te whakamahi anō i te pukapuka i te taha o te mihini ripene kōrero, i tōna kotahi rānei;



- ki te whakaoti i tētahi o ngā hei mahi e pā ana ki te pukapuka;
- ki te whakaharatau kia eke te ākonga ki tētahi atu taumata.

He whakapuaki māramatanga me ngā whakautu

1. Ko wai ngā hua whenua o te kōrero nei?
2. He aha te kaupapa i whakataetae ai aua hua whenua?
3. I pēhea tā rātou whakatairite tētahi ki tētahi?
4. Ki tōu whakaaro, ko wai i toa i te whakataetae?
5. He aha tētahi akoranga ka puta mai pea i te kōrero nei mō tēnei mea, te pākiwaha?

1. Ko Kāreti, ko Kāpeti, ko Rētihi, ko Porokohi, ko Kōkura, ko Aniana.
2. Kia kite ai ko wai te tino hua whenua o rātou katoa.
3. I runga anō i te reka, te pai, te rongo, te mākūkū, te aha atu.
4. Ka rerekē ngā whakautu.
5. Ka rerekē ngā whakautu.

He Mahere – Hei Tautoko i te Reo

E whai ake nei ētahi huarahi hei mahinga ngātahi mā ngā ākonga. Tirohia ngā whārangi kei te Tirohanga Whānui mō ngā tino āhuatanga o te pukapuka nei.

Te pūtaka

T He āta titiro, he tautuhi i ngā āhua whakawhiti kōrerorero mai i te pukapuka.

He whakatakinga ā-roro, he whakaharatau

I mua i te pānui i te pukapuka, kōrerorerotia ngā āhuatanga o ngā momo hua whenua rerekē – te hā, te reka, te mākūkū, te pai (kei te papa kupu ētahi kupu api mō tēnei mahi). Toko whakaarotia ētahi hua whenua e pākiwaha ana mō tēhea o rātou te mea pai rawa. Ki a rātou, me toa ēhea hua whenua. He aha ai?

Kia oti i te ākonga te pukapuka te pānui, whiriwhiria ko wai i toa i roto i te whakataetae. Ko tērā pea te tūmanako o te ākonga?

Titiro ki te āhua i tuhia ai te kōrero nei hei matapaki. Āta titiro ki te whakamahi tika i ngā pikorua i roto i tēnei kōrero.